



Komunikadu Imprensa

15/4/2013

Ministériu Públiku alega tinan 17 ba krime tentativa omisídiu agravadu ho natureza violénsia doméstika

Iha loron 10 Abril 2013, Tribunál Distritál Oe-Cusse hala'ó julgamentu ba arguidu ho inisiál MM hasoru vítima ho inisiál RT nu'udar arguidu nia fen kaben. Kazu ne'e akontese iha loron 5 Setembru 2011, iha Sub-Distritu Nitibe, Distritu Oe-Cusse.

“Aktu ne'e grave teb-tebes, tanba ne'e, JSMP husu ba tribunál atu aplika pena ne'ebé todan tuir alegasaun Ministeriu Públiku nian hodi refleta nivel agravasaun ne'ebé arguidu komete hasoru vítima nu'udar nia fen kaben” dehan Diretór JSMP Luis de Oliveira Sampaio.

Bazeia ba monitorizaan JSMP nian hatudu katak violénsia doméstika nu'udar krime ne'ebé barak liu akontese iha Distritu Oe-cusse.

JSMP ezeji ba Estadu Timor Leste atu asegura katak sidadaun hot-hotu tenke livre husi violénsia. Wainhira falla, ne'e hatudu Estadu kontra nian obrigasuan konstitusional hodi proteze sidadaun sira husi kualker forma violénsia hasoru fetu.

Ministériu Públiku akuza katak iha 5 Setembru 2012, arguidu nia atensaun atu tá iha vítima nia kakorok maibé tanba vítima defende aan ho nia liman loos, nune'é vítima nia liman loos kotu. Arguidu kontinua tá dala ida tan ba parte ulun maibé vítima dala ida tan defende aan ho liman karuk tanba ne'e vítima liman rua kotu hotu.

Alende ne'e arguidu mós kontinua tá vítima niaibun nune'e kauza vítima nia nihan 7 monu. Arguidu kontinua tá vítima nia matan loos no rezulta vítima nia matan aleza permanente.

Kazu ne'e akontese tanba arguidu deskonfia vítima iha relasaun ho mane seluk.

Relasiona ho aktu hirak ne'e, Ministeriu Publiku akuza kontra artigu 23 Kódigu Penál kona-ba tentativa no konjugadu ho Artigu 139 (g) Kódigu Penál konaba krime omisídiu agravadu.

Durante julgamentu arguidu konfesa katak, nia duni mak tá vítima tanba vítima husu bebeik kona-ba hafuhu iha bé matan, maibé tuir loloos arguidu la hafuhu no la deskonfia vitima. Iha audiénsia arguidu mós deklara rasik hakarak tá mate vitima.

Bazeia ba faktu sira ne'e, iha Ministeriu Públiku nia alegasaun finál husu tribunál kondena arguidu ho pena prizaun tinan 17. Maibé Ministeriu Públiku mós husu ba tribunál atu fo pena ne'ebé bele as liu husi alegasaun tanba krime ne'ebé arguidu fundamenta ne'ebé klaru.

Aleinde ne'e, arguidu rasik deklarara iha audiéncia katak loloos nia intensaun atu tá mate vítima la'os atu hakanek deit.

Iha parete seluk,defeza husu ba tribunál atu fó desizaun ne'ebé proporsionál ba arguidu. Tuir defeza katak tribunál la'os deit haree husi vítima nia sofrémentu maibé tanba arguidu mós nu'udar ema ida nia mós sofre wainhira hahalok ne'e akontese tiha.

Defeza mós argumenta katak depois arguidu komete tiha krime ne'e, hanesan ema arguidu psikolojikamente sofre tanba husik hela nia oan sira hamutuk ho vítima ne'ebé alezada. Tanba ne'e defeza husu tribunál atu fó pena prizaun tinan 15 ba arguidu.

Prosesu sentensa sei hala'o iha loron 23 Abril 2013, tuku 9:00 dadersan.

Atu hetan informasaun kle'an favor kontaktu direitamente:

Luis de Oliveira Sampaio

Direitor Ezekutivu JSMP

Diresaun e-mail: luis@jsmp.minihub.org

Landline: 3323883

www.jsmp.tl